

von Wulf Wager

## Audofahra mit Achtzge



Mei Nochbere, Sie wissat jo, des propere 150-Kilo-Prachtsweib, hot en Vaddr, der isch 85 ond em Kopf eigentlich no fit. Aber da Kopf dreha, des goht nemme so guat. Des isch allerdings a Voraussetzung für's Audofahra, denn do sott ma beim Ausschera, Eischera ond beim Eiparka da Kopf dreha. Dennoch fahrt dr 85-jährige Vaddr von meim propera Nachbersweib äwwl no Audo. Des isch scho a bissle leichtsinnig.

Neulich hot'r oin uf dr Landstroß ibrholt, der ihm oifach z' langsam war. Den hot'r ibrholt on no so gschnitta, dass's boide Audo dreht ond en da Graba gnomma hot. Boide Kärra hend en Totalschada ghet. Der Unfallgegner war net viel jünger als meira propera Nochbere ihr Vaddr. Der isch sofort zu dem Unfallgegner, hot sich entschuldigt ond gsait: "Des reglat mr so. Do holat mr koi Polizei, sonscht send mir boide da Pappadeckl los!" So hend se's no gmacht.

Neulich isch'r von dr Polizei aghalta worda. Dia hend ehn gfrogt, ob er was tronka häb. Dodrurf er: Bloß en kloina Wachtmeischer, Herr Jägermeischer. Seither fährt en sei Dochdr, mei Nochbere, des propere 150-Kilo-Prachtsweib.

Bis näggschdmol

Ihr

A large, stylized handwritten signature in black ink, appearing to read 'Wager'. The signature is written over a light-colored background and extends across the width of the page.

Alle Kolumna zom nochlesa  
ondr: [www.woascht.de](http://www.woascht.de)  
oder em Facebook em  
WulfWager Fanclub.